



Inatsisartunut ilaasortaq
Jens-Frederik Nielsen
Demokraatit
/Maani

Ikuallaasarneq eqqagassalerinerlu pillugit § 37 naapertorlugu apeqquteqaammut nr. 58-2024-mut akissut

Asasara Jens-Frederik Nielsen

Inatsisartut Suleriaasianni § 37 imm. 1 naapertorlugu Naalakkersuisunut apeqquteqaammik saqqummiussivutit. Naalakkersuisut apeqqutissinnut, matuma kinguliani issuarneqartunut akissuteqarfigineqartunullu, qujapput.

1. **Inoqarfiit qassit eqqakkanik annertusigaluttuinnartunik ajornartorsiuteqarpat?**
 - a. **Tassunga suna peqqutaava?**
 - b. **Unammilligassap taassuma aaqinniarnernut Naalakkersuisut sunik aallartitsissallutik eqqarsaateqarpat?**

Akissut: Kommunini inoqarfinni tamaginni avatangiisinut peqqinnissamullu isumannaatsumik eqqagassalerisoqarnissaata qulakkeernissaanut, kommunit ataasiakkaat akisussaasuupput. Kommunit tamarmik inatsisit naapertorlugit kommunini eqqagassalerinermut pilersaarummik suliaqartussaapput. Eqqagassalerinermut pilersaarut najukkani eqqagassalerinermut, eqqagassat annertussusaannut aammalu eqqagassat immikkuualuttortaannut paasisimaarilersitsisussaavoq, aammalu ukiuni 12-ini aggersuni eqqagassalerinermut suliaqarfinni suliniutissanik pingaarnersiuinissamut nalilersuinissamullu kommunip aqutsinissamut sakkusaatut atorineqartussaalluni. Taamaattumik inoqarfinnut ataasiakkaanut tunngatillugu kommunini ataasiakkaani unammilligassat suliniutissallu kommunip eqqagassalerinermut pilersaarutaani allassimasussaapput.

Kommunit ataatsimut isigalugu inoqarfinni tamaginni eqqagassalerinerup pitsanngorsarnissaa ukkatarigaat, Naalakkersuisut isumaqarput, kisianni najukkani eqqagassalerinermut tunngatillugu suliniutissallu unammilligassaqqarpoq.

Kommunit ikiorniarlugit Naalakkersuisut ukiorpassuit ingerlaneranni Avatangiisinut aningaasaateqarfikkoortumik kommunini eqqagassalerinermut suliaqarfinni kommunit ineriartortitsinerannut tapersiisarput. Assersuutigalugu eqqagassalerinermut suliaqarfinni immikkut ittumik suliniuteqarneq aallartinneqqarpoq, tassani piffissami ukiunik marlunnik sivilissusilimmi kommuninut tamaginnut immikkut 3. mio. koruunit inniminnigaallutik. Aningaasassanut immikkoortinneqartunut siunertaavoq kommunit suliniutissaasa ingerlasut taper-sorneqarnissaat. Aningaasassat ilaatigut inoqarfinni ataasiakkaani eqqagas-

Allakkat ulluat: 25-03-2024
Suliap nr.: 2024 - 5985
Allagaatip ilisarnaataa:
23997718

Postboks 1614
3900 Nuuk
Oqa.: (+299) 34 50 00
Fax: (+299) 34 54 10
E-mail: pan@nanaoq.gl
www.naalakkersuisut.gl

salerinermik assartuussinermilu aaqqiissutissanik pitsanngorsaaqataasussaapput. Tamanna assersuutigalugu balle-nut naqitsissutinik pisinermut imaluunniit suliniutissanut allanut tapersii-nerusinnaavoq.

Eqqagassalerinermut suliassa qarfimmi immikkut ittumik suliniuteqarnermut atatillugu nunatsinni kommunit tamaasa tikeraarpakka, tassani kommunit unamilligassaat kiisalu eqqagassalerinermut suliassa qarfimmi ungasissumut pilersaarutaat erseqqinnerusumik tusarniarsimallugit. Aamma Avatangiisinut aningaasaate qarfimiit aningaasassat qanoq eqqagassalerinermut suliassa qarfimmi pitsaasumik ineriartortitsinissamut tapersiisinnaanersut pillugu pilersitsiviulluurtumik oqaloqatigiippugut.

2. Piffissaq qanoq ippa, qaqugukkut nunatsinni piffinni tamani eqqagassat silap pissusaanut avatangiisinullu ajoqutaanngitsumik peernissaannut?

Akissut: Naalackersuisut Eqqagassalerinermut iliuusissanut pilersaarut 2020 – 2031, aallaavigalugu sulipput ingerlatsillutillu. Taamaattumik piffissamut pilersaaruserfiusumut anguniakkanut siunnerfiillu ilaasa sukumiisortaannut erseqqinnerusunut tunngatillugu Eqqagassalerinermut iliuusissanut pilersaarut inner-suussutigineqarpoq. Eqqagassalerinermut pilersaarummi nunami namminermi eqqagassanut politikkimut malittarisassiisoqarpoq, peqatigisaanillu kommunit najukkani eqqagassalerinermut pilersaarusernerannut eqqagassalerinerannullu killissaliussanik aalajangersaaviulluni.

Ataatsimoortumik ikuallaasarnermut aaqqiissutissarsinissaq pillugu Eqqagassalerinermut iliuusissanut pilersaarummi anguniakkat angusaqarfiulluurtumik ingerlalluarput. ESANI A/S marlunnik nutaanik ikuallaaviliorluni ingerlallualleruttorpoq. Nuummi ikuallaavissaq 2024-p qiteqqunnerani aammalu Sisimiuni ikuallaavissaq 2025-mi naammassissasut naatsorsuutigineqarpoq. Sanaartorneq taanna aamma Avatangiisinut aningaasaate qarfikkoortumik tapiiffigineqarpoq. Ikuallaavissat naammassippata, tamanna ilaatigut eqqagassat ikuallanneqarsinnaasut avatangiisinut peqqinnissamullu isumannaatsumik passunneqartarnissaanik qulakkeereqataasussaavoq.

Oqaatigineqareersutut kommunit eqqagassalerinermut akisussaasuupput. Kommunit inoqarfinnut ataasiakkaanut piffissaliinerat suliniutissaallu kommunini eqqagassalerinermut pilersaarutini allassimassapput.

3. Eqqartorneqartumut attuumassutilinnik allanik Naalackersuisut paasissutissiisinnaappat?

Akissut: Aatsitassanik Suliassa qarfinnut Avatangiisinut Aqutsisoqarfik paasissutissiivoq:

Aatsitassanut tunngasunik suliaqarnermut atatillugu eqqagassalerineq Aatsitassanut tunngasunik suliaqarneq pillugu Inatsisartut inatsisaat (aatsitassanut inatsit) naapertorlugu maleruagassiivigineqarpoq. §88-imi allassimavoq aatsitassarsior-

luni misissuineranut aatsitassanillu piiaaneranut atatillugu ingerlatassat tamarmik "teknologii pissarsiarineqarsinnaasoq pitsaaner-paaq" aamma "iliuusissat mingutsitsineramik akiuisussat sapinngisamik pitsaanerpaat" atorlugit suliarineqartussaasut.

Nunalerineranut, Imminut Pilersorneranut, Nukissiutinut Avatangiisinullu Naalakkersuisup inassuteqarnera malillugu, tassunga atatillugu eqqakkat ikuallanneqarsinnaasut sapinngisamik annertunerpaamik nunatsinni ikuallaavinni suliarineqartarnissaat Aatsitassanik Suliassaqarfinnut Avatangiisinut Aqutsisoqarfiup sulissutigaa.

Inussiarnersumik inuulluaqqusillunga



Kalistat Lund



12. marts 2024

Inatsisartut ingerlatsinermut maleruagassaasa § 37 imm. 1 tunngavigalugu matumuuna ukunangga Naalakkersuisunut apeqquteqaateqarpunga.

Naalakkersuisunut apeqquteqaatit:

1. Inoqarfiit qassit eqqakkanik annertusigaluttuinnartunik ajornartorsiuteqarpat?
 - a. Tassunga suna peqqutaava?
 - b. Unammilligassap taassuma aaqqinniarnanunut Naalakkersuisut sunik aallartitsissallutik eqqarsaateqarpat?
2. Piffissaq qanoq ippa, qaqugukkut nunatsinni piffinni tamani eqqagassat silap pissusaanut avatangiisinullu ajoqutaanngitsumik peernissaannut?
3. Eqqartorneqartumut attuumassutilinnik allanik Naalakkersuisut paasissutissiinnaappat?

(Inatsisartunut ilaasortaq Jens-Frederik Nielsen, Demokraatit)

Tunngavilersuut

Soorunami Demokraatinut pingaartuuvoq, uagut politikkeritut piffissamut ungasinnerusumut eqqarsartuarnissarput. Tamannalu sunut tamanut tunngavoq. Meerartatsinnut ernguttatsinnullu akisussaaffeqarpugut, ilumoorullugu pigisassatsinnik. Tamanna tunngavigalugu Demokraatit tapersorsorpaat, eqqagassat aallaaviusumik silap pissusaanut avatangiisinullu ajoqutaanngitsumik peerneqartarnissaat.

Aammattaarli nassuerutigisariaqarparput, nunatsinni piffiit tamarmik, sulit taamaaliornissamut periarfissaqannginnerat. Taassumalu ajoraluartumik kingunerisarpaa, inoqarfiit ilaanni eqqakkat annertusigaluttuinnartarnerinik, timinik ajoqusersorneqarneq aammalu innuttaasut peqqissusaannut ajoqutaariataarsinnaasumik. Tamanna akueriuminaappoq, taakkuninngalu apeqquteqaateqarlunga ukkatarissavara, Naalakkersuisut unamminartumut qanoq iliuuseqarniarnersut.

Apeqqutima ullut suliffiusut qulit iluanni akissutaasa tiginissaat qilanaaraaraa.